

PASTICCIARIA TRIESTE

Zùccaro, sciòre, mènnole munnate
e macenate, 'e vaniglia l'addore,
'na 'nticchia 'e cafè buono o 'e cacàvo,
'nu surzo de cuncierto o 'e limunciello,
tutto 'mpastato a fà' tanta morzille
mise int' 'o forno, 'na cerasa 'ncoppa:
tècchete ccà 'o 'ncantésemo annascuso
d' 'a pasticciaria Trieste a Majure
â parte 'e coppa d' 'o corso Riginna.

Pecché se chiamma Trieste nun 'o saccio:
tantillo è 'o nomme ma 'o profumo è gruosso
ca se spanne pe' ll'aria e arriva a mare.
Scummetto: nun se trova niente 'e meglio.

Pe' l'assapurà' buono e alliccà' 'o musso
avimmo venì' ccà. Chesta è 'a putéca
d' 'a robba dóce, d' 'a pasta riàla,
d' 'e suspire, d' 'e zeppole, pastiere,
gattò mariàgge, strùffole e sfugliate.

E quanno è àusto fa 'na mulignana
cu 'a ciucculata ca nce fa recrià'.

SIGISMONDO NASTRI

Maiori, 12 luglio 2013

Questa poesia è stata recitata a Villa Guariglia in Raito nella sera del 31 luglio 2013, durante la presentazione del libro “ *Ho coltivato sogni* “ dell'amico Sigismondo Nastri, giornalista e autore.